

# Alam Islam

## Alam Islam...Hari Ini dan Akan Datang

(Terjemahan Penyunting Qalam)

Barangkali akan terhitung suatu keberanian terhadap kebenaran kalau seseorang itu memandang kepada masa depan alam Islam semenjak dua puluh atau tiga puluh tahun yang lalu. Sebabnya, ialah kerana mengenangkan keadaan umat Islam di segala negeri-negeri Islam yang serba sulit dan berat penanggungannya dan banyak penyakit-penyakit masyarakat yang sedang menyerangnya.

Barangkali penyakit yang sangat-sangat berbahaya dari penyakit-penyakit yang tersebut, yang telah memperkosa alam Islam dengan kejamnya, ialah penjajahan yang sedang mencengkamnya, dan telah menguasai hampir segala negeri-negeri mereka tidak ada sesuatu umat dari umat-umat Islam yang telah terselamat daripada angkaranya, baik secara langsung atau sebaliknya.

Penjajahan apabila mencengkam sesuatu bangsa, maknanya keruntuhan yang terus-menerus dalam segala lapangan hidup, baik yang berupa kebendaan ataupun yang berupa rohani. Penjajah itu tidak berdiam diri dan tidak merasa puas kalau ia tidak dapat menindas segala anasir penghidupan sesuatu bangsa yang telah dijajahnya. Dengan langkahnya itu ia bertujuan hendak membunuh segala cara pertentangan dan melumpuhkan roh perpaduan bangsa itu. Dengan jalan itu bangsa yang tersebut akan tunduk kepada kehendak-kehendak penjajah, akan lemah dan

hina di bawah kuasanya, dan akan tinggal diam menerima tekanannya yang bermaharajalela. Dengan itu juga bangsa itu tidak akan timbul hemahnya untuk menentang penjajah yang zalim setelah ia (bangsa yang terjajah) sekian lama tenggelam di dalam keadaan yang serba gelap-gelita, dan setelah penyakit yang berbahaya itu menyerap dalam seluruh tubuhnya sehingga merosakkan perasaannya dan melumpuhkan rasa kesedarannya.

Jika demikianlah cara-cara penjajah untuk melumpuhkan bangsa-bangsa yang dijajahnya, maka penjajah itu mempunyai cara yang lain dan lebih kejam dalam perhubungannya dengan umat-umat Islam yang dijajahnya. Ia menggunakan terhadap umat-umat Islam – selain daripada segala jenis penguasaan yang bermaharajalela, tamak dan pencerobohan – perasaan taksub agama (Kristiannya) untuk menekan agama Islam, sehingga segala anasir hidup yang ada pada umat Islam itu mati dan kering sumbernya.

Kalau penjajah itu merompak umat-umat yang bukan Islam akan segala pengeluaran hasil buminya, dan menyedut darah kehidupannya, serta membunuh rasa-rasa kesedaran akan kemuliaan bangsa dan tanah airnya, maka dia juga melakukan segala yang demikian itu kepada umat Islam dengan cara yang lebih kejam, dan selain daripada itu ia menumpukan tekanannya kepada rasa kesedaran beragama lalu

berusaha dengan sedaya upayanya untuk melemahkannya, atau untuk membunuhnya dengan berbagai-bagai cara yang diada-adakannya. Kadang-kadang penjajah itu memasukkan jarumnya dalam dasar pelajaran, baik pelajaran umum atau pelajaran agama, lalu dirosakkan dan diasak-asakkannya dengan pelajaran-pelajaran yang kering dan berat, dan dipisahkan dia daripada agama dan segala yang berhubung dengan agama. Kadang-kadang pula penjajah menyebarkan faham-faham yang merosakkan dalam kalangan bangsa yang dijajahnya, dan menyuburkan serta menguatkan kedudukan faham-faham yang tersebut, sehingga racunnya meresap kepada mereka dan menimbulkan penyakit-penyakit masyarakat, seperti penyakit meringan-ringankan agama, melanggar adat istiadat yang sopan, dan tidak mengenal malu dan segan silu.<sup>1</sup> Dengan itu seseorang yang ditimpa penyakit itu akan hilang

rasa kesedarannya terhadap kehormatan diri dan maruahnyanya, dan kerana itu ia tidak akan menggelisah terhadap kezaliman dan tidak akan bangun melawan terhadap penindasan yang kejam.

Di antara paluan-paluan penjajah kepada umat Islam yang membunuh ialah dasarnya memaksakan bahasanya kepada bangsa yang dijajahnya, sehingga dapat dijadikannya bahasa rasmi dan bahasa penghidupan. (Kalau umat itu bangsa Arab – P). Maka dengan langkahnya itu ia dapat menindas bahasa Arab, bahasa al-Qur’ān al-Karīm, dan dengan itu umat yang dijajahnya akan melupakan bahasa ibundanya yang menjadi sekuat-kuat ikatan yang menghubungkan umat itu dengan agama Islam dan menyatukan mereka dalam kumpulan umat Islam. Barangkali gambaran yang sempurna

**Selamat menyambut**

**Hari Ulangtahun yang Keempat**

**Bagi Kemerdekaan**

# **Negara Islam**

**Persekutuan Tanah Melayu**

**Moga-moga selamat dan aman damai dan makmur!**

<sup>1</sup> Tanda noktah tidak kedapatan dalam teks asal; bagaimanapun ruang dan konteks ayat menandakan bahawa terdapat noktah di sini.

tentang jenayah penjajah-penjajah di negeri-negeri Islam dapat dilihat dengan terangnya di Afrika Utara dan di banyak negeri-negeri di Timur Jauh. Penjajah telah menukarkan negeri itu kepada keadaan yang seburuk-buruknya dan telah menjadikan penduduknya dagang di tanah airnya sendiri, tidak mengenal akan bahasanya yang menghubungkannya dengan zamannya yang silam, atau menggunakannya pada zamannya yang ada ini.

Sebenarnya jenayah penjajah kepada umat Islam tidak terhenti kepada sesuatu had yang tertentu. Ia telah merosakkan segala-gala yang baik yang ada pada mereka. Ia telah menindas mereka dengan kemiskinan dan kesengsaraan, dan menghampakan mereka daripada merasa nikmat-nikmat hidup. Ia telah menceburkan mereka ke dalam gaung kejahilan,

dan mematikan rasa kesedaran kebangsaan, lalu menekan bahasa mereka dan menjauhkan mereka daripada agama dan memutuskan perhubungan mereka daripada agama, bahkan memutuskan perhubungan mereka dengan saudara-saudara mereka umat Islam yang lain.

Demikianlah keadaan umat Islam hingga permulaan kurun yang ada ini, berpecah belah kepada beberapa umat yang berasingan, dengan menderita keruntuhan dalam segala lapangan. Oleh itu sukar bagi sesiapa untuk melihat dengan jelas akan kedudukan alam Islam pada zaman yang akan datang kelak, atau dirasai wujudnya di antara benda-benda yang wujud.

– Bersambung.

## Siri Sejarah Hidup Nabi Muḥammad

*Ṣallā Allāhu ‘alayhi wa ‘ālihi wa sallam*

Disusun oleh

**Edrus**

Buku ini disusun dipersesuaikan dengan sukatan pelajaran sejarah Islam untuk pelajaran agama di sekolah kebangsaan di Persekutuan Tanah Melayu. Berpenggal-penggal: 1. Hāshīm bin ‘Abd Manāf, 2. ‘Abd al-Muṭṭalib, Nenda Nabi, 3. ‘Abd Allāh dan Āminah – Ayah Bonda Nabi, 4. Hari Diperanakkan, 5. Halimah al-Sa‘diyyah, 6. Yatim Piatu, 7. Berkahwin dengan Sītī Khadījah, 8. Menerima Wahyu.

Buku ini mengandungi 24 buah. Sambungannya akan segera diterbitkan oleh Qalam Singapura. Harganya 30 sen senaskhah. Belanja mengirim 10 sen.

Pesanlah kepada penerbitnya:

**Qalam, Singapura**

